

鈎餌墮地獄中無有出期今已永脫相代歡
喜說是語時無央數人皆發道意佛說如是
比丘菩薩黑氏梵志天龍鬼神阿須倫世間
人莫不悅豫作禮而去

黑氏梵志經

卷九

阿鳩留經

後漢失譯人名

聞如是一時佛在舍衛國祇樹給孤獨園佛
告諸比丘言昔者有賈客名阿鳩留居處甚
富金銀珍寶奴婢衆多阿鳩留不信有後世

生作善不得善作惡不得惡阿鳩留言人死
後身地外地身水外水身火外火身風外風
身皆共和合人死後終不復生也人所作善
惡心所念口所言身所行皆當棄捐後不復
生時阿鳩留持財貨數千萬與賈客五百人
俱行阿鳩留最尊豪相隨行賈客當經劇道
無水草處所持糧食水草皆以盡行一日二
日不見水草行三日四日不見水草賈客皆
恐怖言今我皆悉當於此荒澤中餓死耶各
自啼哭呼父母妻子阿鳩留遣騎四布行求

水草阿鳩留自行遙見一樹樹葉青青果茲
繁熾自念此樹下猶當有水便前趣樹見一
男子端正無比遙見阿鳩留騎馬來前迎趣
之言多賀來到在所求索阿鳩留見樹下人
答之即大喜如得更生樹下人言從何所來
欲所之到阿鳩留言索救我命及五百人畜
生命樹下人言欲何求索言我欲得水樹下
人便舉右手水從五指端出如流泉甚香味
語阿鳩留言自極飲飲已復從索飯樹下人
便舉右手美食從指端出阿鳩留得飽食已

便舉聲大啼哭樹下人因問仁者啼哭爲何
阿鳩留言我等伴五百人及畜生從三四日
以來皆不得飲食飢餓甚極命在須臾是故
我啼哭耳樹下人語阿鳩留若行將五百人
及畜生來我悉爲若飽之阿鳩留即馳行呼
伴人語之言勿復憂也以得飲食處隨我去
來伴人大喜便隨去到樹下皆叉手爲樹下
人作禮樹下人問言欲何所得人皆答言大
飢渴樹下人即復舉右手五指端即復大水
出如流泉人馬畜生皆飲復從索飯樹下人

復舉右手五指端出名美飯食與之五百人
及畜生皆飽滿樹下人因問五百人等卿皆
欲至到何等求索賈人言我皆欲到大海求
索珍寶樹下人因問卿皆欲索珍寶者便可
從我手中出樹下人便舉右手從五指端出
金銀水精瑠璃珊瑚琥珀白珠人便歛取
各自重如去樹下人語阿鳩留持此金銀歸
鄉里用布施貧窮者欲得飯者飯之欲得金
銀錢財衣被者極與之令道人皆祝願我令
我得其福令我手中出瑋物又多使我早脫

此荒澤中阿鳩留聞此語大驚怖便以頭面
著地問仁者爲何等人乎是天耶龍耶鬼神
耶是人耶樹下人言我亦非天亦非龍亦非
鬼亦非人我是豪薛荔也我前世時於國中
大貧窮常在城門下坐雖貧窮心淨潔愛樂
沙門道人我貧窮不能施人見他人布施代
其喜時迦葉佛般泥洹去諸比丘來從我乞
食我應比丘言我無所有但遙指示城中
某家善可得飯某家不善不可得飯比丘乞
來出我見有所得即歡喜又迦葉佛般泥洹

卷九

十

去其國王名爲基立爲迦葉佛起七寶塔我
輒持手著其上言令我得其福王上好物於
佛塔我輒持手著之言使我得其福但用貧
故未曾齋飯食無時又飲酒是故死後以作
憂薜荔耳但用我前世見人作善代其歡喜
手著其物上是故令我五指端在所出但用
生時未曾齋故使我作是間薜荔阿鳩留自
念言我前不信有後世生作善不得善作惡
不得惡今我眼見是爲審有後世復生審有
作善得善作惡得惡從今日以去歸鄉里快

當作善布施與人恣所求索人有欲得金銀
珍寶飲食衣被者皆與之不逆人也阿鳩留
歸到鄉里語一國中人誰有欲得金銀珍寶
衣被飲食者恣所求索皆來取之如是布施
無央數日日飯八萬四千道人但灌汁流出
門人用撈船而行阿鳩留作善極意死後便
上第二忉利天上作天人去離天帝坐四百
八十里其國中有乞丐女人名曰嫪以善心
持一杆米粥與沙門摩訶迦葉女人死後亦
生忉利天上作天人在天帝釋邊第三坐復

勝餘天五事何謂五事一者長壽二者端正
三者安樂四者智慧五者威神勝於餘天後
佛母忽故生忉利天時佛天上爲母說經說
經已佛母及諸天無央數皆得須陀洹道佛
因見阿鳩留布施與人遠在天帝釋邊四百
八十里坐復見乞匄女人持米粥與沙門摩
訶迦葉在天帝釋邊第三座又勝餘天五事
佛見悉皆識知即遙呼阿鳩留言布施善人
來相見阿鳩留即來前持頭面著地爲佛作
禮白佛言我布施大衆多但得凡人耳不得

須陀洹斯陀舍阿那舍阿羅漢辟支佛佛道
也今見乞匄女人持米粥與沙門摩訶迦葉
今在天帝釋邊第三座又勝餘天五事人持
小物與摩訶迦葉得福乃爾是故身自致豪
貴如此天便爲佛作禮而去

阿鳩留經